



08.05.2023

UPA2023/125

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalackersuisut nuna tamakkerlugu puigortunngortunik ataqatigiissaarisussamik pilersitsinissaannut suliniummik misissuinissaanik peqquneqarnissaannik Inatsisartut aalajangigaassaattut siunnersuut. Misissuinerup inernera UPA2024-mi saqqummiunneqassaaq.

(Inatsisartuni ilaasortaq Paneeraq Olsen, Naleraq)

Inatsisartuni ilaasortaq Paneeraq Olsen, Naleraq-minngaaniit siunnersuutaanut Siumuminngaaniit imaattumik oqaaseqarfigissavarput.

Siumuminngaaniit siunnersuuteqartup siunnersuutigisaa pingaaruteqartutut isigivarput. Siumumingaaniimi nalunnginnatsigu ullutsinni utoqqaliarsaalersut malunnarsiartortut puiornermik napparsimalersartut ukiuni kingullerni amerliartortut. Puiornermik napparsimalersartut nunatsinni taamatut amerliartornerat qularnanngitsumik arlaatigut peqquteqarsimassasoq Siumuminngaaniit malinnaaffigilluarneqarnissaa soqutigintartutut isigaaarput.

Siunnersuuteqartup §37-vernermigut apeqquteqareerluni akissutinermigut paasivaa nunatsinni puiornermik napparsimalersartut arlaqalersimasuusut. Soorlu aamma siunnersuuteqartup aallaqqaasiinermini nassuiaassutigisaa tamanna. Paasisaanimi naatsorsuutigineqarmat puioortunngortartut ukiut tamaasa 40-nik amerliartortarsimassasut. Tamannalu paasisaq aallaavigalugu nunatsinni ukioq 2030-mi katillugit 418-nik amerlassuseqalersimassasut.

Siumuminngaaniit ilisimaarivarput kommunit ilaanni puioortunngortut sullinneqarnermikkut pitsaanerumik atugaqarnissaannut periarfissarsiorlugit iliuusissanik ujaasisoqartoq. Tassa aamma qallunaat nunaannut puioortunngortunut periuuserineqartartut ornillugit paasiniaaffiginiarlugit pilersaaruteqartut.

Inuimmi puioortunngortutut nappaateqaleraangamik sakkortusiartortarnerat ilungersunartutut pissusilersinnaasarnerat tamakkuninnga sulisuusartut oqaatigisaraat Siumuminngaaniit ilisimaarivarput. puioortunngortummi aamma nukersorsinnaasarnerat sakkortuumik pisarsinnaasut oqaatigisarpaat, kiisalu aamma silamut anigaangamik atisaajarsinnaallutillu pissusilersortarsimasut paasissutigisarpaat uffa sila nillersinnaasaraluaqisoq. Tassa puioortunngortut nappaatigisartik assigiinngitsutut atortarpaat, sullissisunut ilungersunangaartumik aamma nukipparsuarnik atuiffigisinnaasunik misilitsitsiffiusinnaasartunik.

Siumuminngaaniit pingaartipparput inuit napparsimalersimasut aammalu puioortunngorsimasut sapinngisamik pitsaanerpaamik ikiorneqarnissaannik, periarfissinneqarnissaat ujartuiffigineqartuassasoq,



taamaamat utoqqaat pillugit periusissiamik aamma puiortunngortut suleqataaffigalugit pimoorussaqaarnikuuvugut, suliarlu ukioq manna martsimi saqqumerpoq. Periusissiamilu puiortunngortunut ilaqaataasunullu periuserineqarsinnaasunik erseqissaanerit takuneqarsinnaapput. Soorlu Naalackersuisup aamma tamanna saqqummiinermini erseqqissaraa. Siumuminngaaniillu pingaartutut isigaarput inuit sullissisartut puiortunngortunut sullissinerat ataavartumik pikkorissartuarnissaat pisariaqarlunnartusoq. Sumiluunniit pikkorissarnerit ingerlanneqaraangata ilisimasassat sakkussat pissarsiarineqartartut qaqugukkunniillu iluaqtaajuartarmata tamanna pingaartillugu oqaatigissuarput.

Siumumiillu aamma eqqaarusupparput inuit assigiinngitsutigut ajutoornermikkut puiortunngorsinnaasartut utoqqaat illuannut pisiinnartarnerat taamaattussaannartut isiginagu pitsaanerusemik periuseqarnissatsinni eqqaamaneqartariaqartoq. Tassami utoqqarni sullissiniarnermi nunatsinni tusartuarpaput sulissussanik amigaateqartuarneq. Sulisuusartullu ilaasa tamakkiisumik ilinniagaqarsimasannginnerat sulisoqarniarnitsinnik amigartarnerannik peqqutit ilagisinnaasarmassut.

Siunnersuuteqartup eqqaavaa nuna tamakkerlugu puiortunngortunut ataqatigiissaarisoqannginnera iliuuseqarfigineqartariaqartoq, Siumuminngaaniillu oqariartuutigineqartoq paasilluarparput, massakkut Naalackersuisut akissutiminni sulianik taama itturnik suliaqarlutik aallartissimallutik oqaatigivaat. Tassami periusissiami ingerlanneqartumi innuttaasunut akuutinneqarnissaannik paasissutissanik atorfissaqartinneqartunik paasissassarsiornissaminnik nr 7 -mi sammisaqarmata.

Siumuminngaaniit siunnersuuteqartup siunnersuutigisaa iluatinnartutut isigalugu Naalackersuisut suliaannut ilaliunneqarnissaa soqutiginnartutut isumaqarfigivarput. Siumuminngaaniillu neriuutigaarput angusassaasut siunnersuuteqartup oqariartorneratut pitsaasumik tamakkiinerusemillu angusaqarfigineqarumaartut kiisalu ataatsimiititaliami nalilersueqqissaarnissaq ingerlanneqartuarumaartoq.

Siumuminngaaniit taamatut oqaaseqarluta siunnersuut ilaqtariinnermut peqqissutsimullu ataatsimiititaliamut ingerlanneqarnissaa kissaatigivarput. Sulilluartoqarnissaanilu kissaassivugut.

Mala Høy Kúko, Siumut